

Vandaag bin-k èven naor 't wiekcentrum Bestevaer egaon umdät dör een boekpresentatie zol wèen aover de Oosterenk.

En dan e-k 't niet aover 't ni'je stadion van PEC, maer 't verlören egaone tuindersgebied dat ter vrogger is ewest.

Een old Zwollenaer, Anne Bouwers, die dör is geboren en getogen maer now in Voorburg woont, ef een bukien eskrèven aover die geskiedenis van dit gebied en de families die der woonden veurdät 't ele zakien is esloopt umdät veuruutgank van stadsuutbreiding niet meer te stoppen was.

En wöör praot wi'j dan aover? . . 1963 !

A-j naogaot wat ter in de läste vieftig jöör dan allemaole veranderd is, lopen oe de griebels aover de grabbels.

Maer goed . . .
kwärt veur drie . . .
een man of tiene in
de zaal.

De auteur en zien
familie kiesen wat
bedenkeliijk.

En dan . . . iniens is
't net of ter een
voetbalwedstried is
of-elopen en kump
mi'j der een batse
volk binnen . . .

zodät de örganisatoren gien raad meer wissen met 't brengen van de koffie en de neudige stoelen.

De (grote-)zaal zat iniens bärstens vol.

't Leken wel of alle old bewoners uut de Oosterenk en direkte umgèving een reünie adden.

Ik zatte dör as niet Oosterenker in de zaal en ebbe vake mutten uutlègen dät ik ter niet vandan kwamme, maer uut de Indische buurte.

Want oe vake mi'j is evraagd; van wie bin ie dan? . . dat e-k niet eteld.





Värder was 't veur de aanwezigen een feest van erkennig en 't oprækelen van olde veraelen.



Veurdät ter een boekpresentatie kon wörren egöven waeren alle bukies al uutverkocht.

Anne Bouwman ef nog wel èven aover zien weerkwieze espröken en ook an-egöven dät ij veural de veraelen van de old bewoners ef willen vastleggen en döör een bettien gebied-geskiedenis an ef toe-evoegd.

De titel ***Ontwaakt Verleden***, bedacht door Jacoba Haas, is echt wat er is gebeurt. De old bewoners en betröcken pärremetaosie's bint wakker ewörren en ebben een boel geskiedenis baoven water weten te kriegen deur in un erinneringen te gaon graven en die an Anne deur te gèven, die döör weer een mooi boekwärkien van ef weten de maken.

Jacoba Haas




Ik ebbe ook nog èven met waerskienlijk de olste anwezige oltbewoner, Derk Hageman espröken.



De man zat te genieten van de andacht die ij kreeg en binnen een päär minuten ad ij al veraelen aover zien va. Man . . . dät is veur mi'j een iewigeid terugge. Echt wöör . . . de zaal zat bärsten vol met nog völle meer veraelen !

A-j ook ooit nog een keer een bukien wilt presenteren ma-j aopen dät der ook zo völle volk op of zal kommen . . dit was een geslaegde missie.



Gegevens t.b.v. het doen van nabestellingen.

Titel van het boek: ONTWAAKT VERLEDEN , de opkomst en ondergang van de Oosterenk.

Schrijver: Anne Bouwman

ISBN-nummer: 97894-6203-545-4

Aangeven wat wordt gewenst: Hardcover of Paperback

Bestelling richten aan : Uitgeverij Boekenbent

Valkhof 39

3772 EB Barneveld.

Onder vermelding van: naam, adres ,tel-nr, en e-mailadres.